




REB RWANDA BASIC
EDUCATION BOARD

Isazi n'ikimonyo

Icapwa rya kabiri



Imwe mu nkuru zahize izindi mu irushanwa
ANDIKA RWANDA 2019




REB RWANDA BASIC
EDUCATION BOARD

Iki gitabo ni umutungo
wa Leta y'u Rwanda

Ntikigurishwa



Isazi n'ikimonyo



Imwe mu nkuru zahize izindi mu irushanwa
ANDIKA RWANDA 2019



NYIRIMANZI Natanayeri, yanditse iyi nkuru afite imyaka 12, yiga mu mwaka wa 6 w'amashuri abanza, mu Kigo cy'Amashuri Abanza cya Nyenyeri, Akarere ka Gakenke, Intara y'Amajyaruguru. Iyi nkuru ye, ISAZI N'IKIMONYO ni imwe mu zahize izindi mu irushanwa rya Andika Rwanda 2019.


© 2023 Urwego rw'Igihugu rushinzwe Uburezi bw'Ibanze

Uburenganzira bw'umuhanzi w'ibikubiye muri iki gitabo, bufitwe n'Urwego rw'Igihugu rushinzwe Uburezi bw'Ibanze (REB).

Iki gitabo cyashyizwe ahagaragara bwa mbere ku nkunga ya Amerika ibinyujije mu Kigo cya Leta Zunze Ubumwe z'Amerika Gishinzwe Iterambere Mpuzamahanga (USAID). Ibitekerezo bigikubiyemo si ibya USAID cyangwa Guverinoma ya Leta Zunze Ubumwe z'Amerika. Iki gitabo cyashyizwe ahagaragara bwa kabiri ku nkunga ya Banki y'Isi.



Isazi n'ikimonyo byari inshuti
magara, bisangira akabisi n'agahiye.
Byafatanyaga imirimo yose kandi
bigahuriza hamwe imitungo yabyo. Byari
byarasezeranye kuzakomeza umubano
haba mu byiza ndetse no mu byago.




Umunsi umwe, byambuka ikiraro bijya guhinga mu murima wari hakurya y'uruzi. Bigeze mu murima bihinga bwangu. Nuko birangije bijya kureba niba amateke byahinze yareze.




Mu gihe bitangiye kwitegura gutaha, hagwa imvura nyinshi cyane. Bica amakoma biritwikira ariko imvura ikomeza kuba nyinshi.

Maze byiruka bijya kugama mu rugo rwari hafi aho. Imvura ihise, bishimira ababyugamishije, birasezera birataha.



Ikimonyo n'isazi bigeze ku ruzi bisanga rwuzuye. Amazi yari yatwaye ikiraro, maze bibura uko byambuka. Ikimonyo gisaba isazi kucyambutsa, iranga. Erega kigira ngo ni imikino! Ikimonyo kibwira isazi kiti: “Ariko urabona tugera imuhira ryari?”




Isazi yirengagiza amasezerano byagiranye,
maze itangira kwirata ku kimonyo.

Ikishongoraho biratinda!

Isazi iti : “Cyo se mugenzi wange urambuka
ute? Umva ko wigenje, nange ndore!”

Irongera iti: “Ngewe nifitiye amababa yange,
reka nigurukire ngaho urabeho!” Isazi ibwira
ikimonyo kugumana umurima byahingaga,
yo ikajyana ibyo hakurya y’uruzi.



Ikimonyo kibuze uko kibigenza, agahinda karakica, gishaka kwiroha mu ruzi, birakinanira. Kiricara kitegereza uko amazi yivumbagatanya kigira ubwoba. Nuko gicurika umutwe mu maguru. Ikimonyo kibunza imitima, kibaza aho kirara, kandi n'inzara yari ikimereye nabi.




Ikimonyo gikomeza kwibaza ukuntu inshuti yacyo magara kizeraga yatinyutse kugihemukira bigeze aho. Kera kabaye, haza uruyuki rusanga ikimonyo cyahangayitse. Uruyuki rurakibaza ruti: “Byakugendekeye bite ko nkubonye nkakuka umutima?”



Uruyuki rusaba ikimonyo kwihangana kizarubwira uko byagenze, kugira ngo bishakire hamwe umuti.

Ikimonyo kubera agahinda kenshi, kiraturika kirarira. Kibwira uruyuki ukuntu isazi yagitereranye mu byago, ikajya kwigarurira imitungo byari bifatanyije.




Uruyuki rumaze kubyumva, rurakihanganisha ruti : “Yooo! Mbese ni uko byakugendekeye! Ihangane, uzabona izindi nshuti nziza zizagukunda mu bihe byose.” Ikimonyo gishimira uruyuki, kirubwira ko kigerageza kwihangana.




Uruyuki ruti: “Reka ndebe uko nagufasha nkwambutse maze utahwe. Data yahoraga ambwira ko inshuti uyikura ku nzira. Ikizima ni ukugira neza.”


Uruyuki rurunama, rurambura amababa, ikimonyo kijya mu mugongo kirafata kirakomeza.




Uruguayi ruritunatuna, rushyiramo
imbaraga zose, rurakigurukana.
Hanyuma byambuka uruzi.
Ku bw'amahirwe bigera hakurya yarwo
amahoro.



Uruyuki n'ikimonyo biriruhutsa. Ruricara, rwihanagura ibyuya byari byarurenze. Ikimonyo kinarushimira cyane. Kirarubwira kiti: “Nzakwitura ineza ungiriye, kandi sinzigera nyibagirwa na rimwe.”




Ikimonyo gisaba uruyuki kugiherekeza, bikagerana imuhira bigasangira. Cyari cyasizeyo umutobe. Bigeze mu rugo, bisanga isazi yatumiye abaturanyi barimo kunywa nk'aho ntacyabaye.




Isazi yari yababwiye ko ikimonyo cyagiye mu rugendo rwa kure kandi kitazaza vuba. Isazi ikubise ikimonyo amaso ibura aho irigitira, ikimwaro kirayica. Itangira kuvuga ururimi rutava mu kanwa.




Abaturanyi bagwa mu kantu, batangira kubazanya ibibaye. Ikimonyo kibwira abari aho ubuhemu isazi yagikoreye. Bose barumirwa basaba isazi kuvuga icyabiyiteye.



Isazi yemera icyaha. Irapfukama, isaba ikimonyo imbabazi n’abari aho bose. Ikimonyo kiriyumvira, kigisha umutima inama. Kigeze aho kiravuga kiti: “Muvandimwe ubwo wemeye icyaha ugasaba imbabazi, ndakubabariye.”



Ikimonyo gisaba abateraniye aho bose gushimira uruyuki kuko rwagikuye ahakomeye. Ikimonyo gihereza uruyuki igikombe cyuzuye umutobe, kirubwira ko bibaye inshuti zikomeye.



Abari aho bose bakomera amashyi uruyuki. Barushimira ubutwari rwagize. Isazi yo barayigaya, bayibwira ko ibyo yakoze bidakwiye. Bayisaba kutazongera guhemuka ukundi. Isazi irabyemera iranabashimira.

